



Na osnovu člana 22 Statuta Brčko distrikta Bosne i Hercegovine (Službeni glasnik Brčko distrikta BiH, broj 2/10 – prečišćeni tekst), Skupština Brčko distrikta BiH, na 68. redovnoj sjednici održanoj 14. oktobra 2020. godine, usvaja

**ZAKON**  
**O IZMJENAMA ZAKONA O PLATAMA I NAKNADAMA ZAPOSLENIH U**  
**PRAVOSUĐU BRČKO DISTRIKTA BiH**

**Član 1**

U članu 4 Zakona o platama i naknadama zaposlenih u Pravosuđu Brčko distrikta BiH (Službeni glasnik Brčko distrikta Bosne i Hercegovine, brojevi: 08/19; 10/19 i 12/19), tačka a) mijenja se i glasi:

„a) ista plata za isti ili sličan posao, podrazumijeva da zaposleni u istoj ili različitoj pravosudnoj instituciji u kojima obavljaju iste ili slične poslove i imaju isti stepen stručne spreme svrstavaju se u isti platni razred.“

U istom članu, tačka c) mijenja se i glasi:

„c) fiskalna odgovornost – podrazumijeva da se prilikom utvrđivanja osnovice za obračun plate budžetskog korisnika, vodi računa o fiskalnoj održivosti Distrikta.“

**Član 2**

Član 6 Zakona o platama i naknadama zaposlenih u Pravosuđu Brčko distrikta BiH (Službeni glasnik Brčko distrikta Bosne i Hercegovine, brojevi: 08/19; 10/19 i 12/19), mijenja se i glasi:

“Član 6  
(Plata)

- (1) Zaposlenicima se utvrđuje osnovna plata na mjesečnom nivou.
- (2) Osnovna plata utvrđuje se množenjem osnovice za obračun plate i pripadajućeg koeficijenta.
- (3) Plata zaposlenih obračunava se u bruto i neto iznosu.
- (4) Plata u bruto iznosu obuhvata neto platu i doprinose.

(5) Plata u neto iznosu sastoji se od osnovne plate i dodatka na platu i obračunava se prije oporezivanja.

(6) Plata za isplatu predstavlja neto platu nakon odbitka poreza na dohodak.“

### **Član 3**

Član 7 Zakona o platama i naknadama zaposlenih u Pravosuđu Brčko distrikta BiH (Službeni glasnik Brčko distrikta Bosne i Hercegovine, brojevi: 08/19; 10/19 i 12/19), mijenja se i glasi:

#### **„Član 7**

**(Osnovica za obračun plate)**

(1) Osnovicu za obračun plate, na prijedlog gradonačelnika Distrikta, uz prethodno pribavljenu procjenu Direkcije za finansije, utvrđuje odlukom Skupština Distrikta do 30. juna tekuće godine, za narednu fiskalnu godinu.

(2) Osnovica iz stava 1 ovoga člana može se izmijeniti u toku fiskalne godine ako za to postoje opravdani razlozi a u cilju održavanja makroekonomske stabilnosti Distrikta.

(3) Osnovica iz stavova 1 i 2 ovoga člana predstavlja najnižu platu i ne može biti niža od 654, 20 KM.

(4) Ukoliko budžet za narednu fiskalnu godinu ne bude usvojen do 31. decembra tekuće godine, nova osnovica za obračun plate primjenjuje se od narednog mjeseca od dana usvajanja budžeta.”

### **Član 4**

Član 20 Zakona o platama i naknadama zaposlenih u Pravosuđu Brčko distrikta BiH (Službeni glasnik Brčko distrikta Bosne i Hercegovine, brojevi: 08/19; 10/19 i 12/19), mijenja se i glasi:

#### **„Član 20**

**(Naknada plate)**

Ovim zakonom utvrđuje se naknada plate za:

a) godišnji odmor i plaćeno odsustvo u visini osnovne plate uvećane za dodatak na platu po osnovu radnog staža;

b) praznik i neradni dan u skladu s odlukom Skupštine Distrikta, u visini osnovne plate uvećane za dodatak na platu po osnovu radnog staža;

c) prekid rada koji je nastupio zbog okolnosti na koje zaposleni nije mogao uticati, u visini osnovne plate uvećane za dodatak na plate po osnovu radnog staža;

d) privremenu spriječenost za rad zbog bolovanja i drugih slučajeva propisanih Zakonom o zdravstvenom osiguranju na način i u visini kako je propisano tim zakonom, uvećane za pun iznos dodatka na osnovnu platu po osnovu radnog staža;

e) jednog od roditelja djeteta s teškim smetnjama u razvoju koji radi polovicu punog radnog vremena, kada se radi o samohranom roditelju ili kada su oba roditelja zaposlena;

f) jednog od roditelja djeteta kome je, prema nalazu zdravstvene ustanove ili ljekara, potrebna pojačana briga i njega nakon isteka porodiljskog odsustva, dok dijete ne navrší dvije godine života;

g) vrijeme produženja radno-pravnog statusa lica zaposlenih na mandatnim radnim mjestima, u skladu s posebnim Zakonom;

h) period privremenog udaljenja iz službe u visini 80 % osnovne plate isplaćene u mjesecu koji prethodi udaljenju, uvećane za pun iznos dodatka na osnovnu platu po osnovu radnog staža.”

### **Član 5**

Član 27 Zakona o platama i naknadama zaposlenih u Pravosuđu Brčko distrikta BiH (Službeni glasnik Brčko distrikta Bosne i Hercegovine, brojevi: 08/19; 10/19 i 12/19), mijenja se i glasi:

#### **„Član 27**

##### **(Obračun i isplata plata)**

(1) Direkcija vrši obračun i isplatu plata za budžetske korisnike korištenjem sistema centralizovanog obračuna plata, po zahtjevu budžetskog korisnika za obračun i isplatu plata.

(2) Budžetski korisnik odgovara za tačnost podataka navedenih u zahtjevu za obračun i isplatu plata.

(3) Isplata plata vrši se do 10. u mjesecu za prethodni mjesec.

(4) Obračunata i isplaćena bruto plata ne može biti niža od najniže više osnovice za obračun doprinosa u entitetima.

(5) Ne može se vršiti obračun plata s retroaktivnim dejstvom za ona radna mjesta gdje je promijenjena osnovica ili koeficijent platnog razreda.“

### **Član 6**

Ovaj zakon stupa na snagu narednog dana od dana objavljivanja u Službenom glasniku Brčko distrikta BiH.

Broj: 01-02-1049/20

Brčko, 14. 10. 2020. godine

**PREDSJEDNIK**  
**SKUPŠTINE BRČKO DISTRIKTA BiH**  
**Esed Kadrić**